

# NOTA DE PRENSA

## SELMANA DE LES LLETRES EN TPA Y RPA

- *Martes 4 de mayu, “Pruebes de autor. Les siete vides de Nel Amaro”*
- *Viernes 7 de mayu, Actu institucional de l'Academia de la Llingua Asturiana na TPA y RPA*
- *Domingu 9 de mayu, “Somos voces”*

### Xixón, 3 de mayu

Con motivu de la 42 *Selmana de les Lletres Asturianas*, Radiotelevisión del Principáu d'Asturies (RTPA) emite una programación especial. Los informativos van incluyir noticies n'asturianu. *Conexión Asturias* va tar nos actos de la Selmana de les Lletres que trenscurren nel so horariu. Va haber espacios pa la música en llingua asturiana y una programación especial n'asturianu.

El martes 4 de mayu, TPA estrena el documental “Pruebes d'autor. Les siete vides de Nel Amaro”. El documental percuerre la vida del escritor y artista multidisciplinar Nel Amaro, al que'l Gobiernu d'Asturies-y dedica esti añu la Selmana de les Lletres Asturianas.

Amigos, familia, escritores y otros persones que conocieron a Nel, xunto a espertos na so época, faen un viaxe peles distintes facetes de la obra y la personalidá del artista de Mieres, pasando pela poesía, el teatru y les distintes formes performance que desendolcó l'escritor, asina como los episodios personales y políticos que marcaron la vida de Nel Amaro. El documental, un encargu de la Consejería de Cultura, Política Llingüística y Turismu, diríxelu Inaciu Galán y cunta col asesoramientu biográficu y guión del escritor Xandru Fernández.

El xueves 6 de mayu, la revista cultural *Pieces* súmase a la celebración de la 42 edición de la *Selmana de les Lletres Asturianas* con un programa especial con Xandru Fernández, que presenta les actividaes entamaes alreduro de la figura y la obra del Nel Amaro. L'escritor Ismael González Arias presenta la novela “La reserva protexida de Les Cuenques”. El Coru

Antifacista Al Altu la Lleva presenta'l clip del cantar "La cadena del amor". L'historiador Eduardo Abad presenta l'ensayu colectivu "El antifranquismo asturiano en (la) Transición". Susana Sela y Maitetxu Isla presenten el llibru infantil "¡Bum!".

RTPA va retresmitir l'actu institucional qu'entama l'Academia de la Llingua Asturiana con motivu del Día de les Lletres. L'actu va celebrase nel Teatru Campoamor, d'Uviéu, y la radiotelevisión pública asturiana va dar cuenta, a lo llargo de la so hora de duración, de la Xunta Extraordinaria de l'Academia, del nomamientu de los académicos nuevos y del discursu del presidente de l'Academia, Xosé Antón González Riaño. La retresmisión de la celebración más solemne de les Lletres Asturianas, el vienres 7 de mayu, va empezar a les 12:00 hores. Esti espaciu va tar conducíu por Naciu Varillas.

El sábadu, 8 de mayu, depués del cine asturianu, TPA va recuperar un programa especial de Cantadera, con Carlos Velasco, de Carbayín, que va interpretar 'Viva la xente minera'. Dende Cabrales, Ricardo Balmori va faer lo propio con '¿U vas tan ceo?' y 'Fartástime a panoyaes'. Carlos Rubiera va cantar 'La capitana' y 'Sardinera de Xixón'. Alicia Villanueva, de Bimenes, 'Coyí d'un artu una flor' y 'Onde la nublina'. El músicu Toli Morilla va interpretar 'Magar la distancia. Grupos de la talla de Nuberu, Taranus y Asturias mining company van acompañanos esti sábadu a partir de les 12 de la nueche.

La programación especial contará cola emisión de les pieces "10 lletres, 10 cantares", con Anabel Santiago, Mariluz Cristobal Caunedo, Elle Belga, Ramón Blanco, Héctor Braga...

El domingu 9 de mayu, TPA estrena'l formatu "Somos voces" dedicáu a les agrupaciones corales del Principáu. De la mano de Ismael Arias vamos percorrer la hestoria de la música coral n'Asturies recuperando actuaciones de estos 15 años d'esistencia de RTPA. Y nada meyor qu'entamar col programa dedicáu a los ciclos corales del Principáu organizados por FECORA. Un concertu inéditu que va suponer el puntu de partida d'esta iniciativa que pretende rindir homenaxe a la familia coral tan castigada pola pandemia y servir para la recuperación de l'actividá coral.

El programa que va estrenase'l domingu 9 de mayu a les 23:00h, cuenta cola ayuda económica de la Dirección Xeneral de Política Llingüística. Un programa p'esfrutar de les actuaciones d'ochotes, orfeones, corales, cuartetos..., de la riqueza musical d'Asturies.

### **ESPECIAL SELMANA DE LES LLETRES NA RPA**

La Radio del Principáu d'Asturies (RPA) va realizar distintes emisiones en llingua asturiana. Nesta ocasión, van emitise 25 espacios rellacionaos na figura del escritor Nel Amaro,

protagonista esti añu de la Selmana de les Lletres. Caúna de les pieces va emitise depués los boletinos de noticies.

Los distintos programes de RPA, dedicarán tamién, dientro de los sos conteníos habituales, espacios en llingua asturiana, que van dar cuenta de l'axenda de los actos diarios, con entevistes a distintos escritores, nuevos miembros de l'Academia, etc.

RPA va retresmitir tamién, como tolos años, l'actu institucional qu'entama l'Academia de la Llingua Asturiana con motivu del Día de les Lletres.